

# TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

*"E rave rahi to tei taoto i raro i te repo nei e ara mai; e rave i te ora mure ore te tahi pae, e te tahi pae e rave ia i te haama e te vahavaha mure ore."* Daniela 12: 2.

Nu. 7.

10 Eperera, 1911.

Mat. 4.

## No Te Tia-Faahou-Raa.

TE tia-faahou-raa o te apiti-faahou-raa ia o te varua e te tino, e te faahuru-ê-raahia ia o te tino repo nei ia faatiahia ei tino varua. "E te varua e te tino o te taatooraa ia no te taata. E o te tia-faahou-raa mai mai te pohe mai o te faaora ia i te taatooraa no te taata." E o te tia-faahou-raa mau ia te reira. A parahi mai ai te Mesia e te mau apose-tolo i teie nei ao ua haapii mai ratou i te tahi mau parau e te huru hoi no te tia-faahou-raa. E ua haapii papu roa Iesu i te huru o to'na ihora tino i muri a'e i to'na tiaraa mai mai te pohe maira. E te vai ra te tau e riro tatou mai ia'na atoa te huru. Ua na ô hoi te parau, e na'na e faahuru ê i to tatou tino haehaa ia hoê atoa huru i to'na iho tino maitai rahi ra. Phil. 3: 21. Ua haapii mai Iesu i ta'na mau aposetolo i teie nei mau haapiiraa parau mau no te tia-faahou-raa. Oia hoi, I. E faatia-faahou-hia te tino mau â o tei pohe, e ua tanuhia i raro i te repo, i nia, mai te pohe maira. Mai ta'na i parauraa e, "A hi'o mai i ta'u rima e ta'u avae, o vau mau â." 2. Ua tia ia fâfâ atu i te tino varua i muri a'e i te tia-faahou-raa, mai te tino taata nei,

hou oia i pohe ai. No te mea ua na ô atura Iesu i te mau aposetolo e, a fâfâ mai na ia ite, aita o te varua e i'ô e te ivi mai to'u nei, ta outou e hi'ô mai nei. Luka 24: 39. 3. O tei faatiahia i nia mai te pohe mai e ore e roohia faahou i te mau mea o tei haapeapea e o tei faataupupu noa'i oia mai tei haapeapea-noa-hia i te tino nei a ora'i oia. Ua maue atu Iesu mai nia'tu i te mou'a ra i mua i te aro o ta'na ihora mau pîpî. O tei faatiahia i nia mai te pohe maira e ore e roohia faahou i te mau tino nei e te pohe. "I aueuehia e mea tahuti noa i faatiahia ei mea tahuti ore." Kor. Hoê 15: 42. 5. Ua amu e ua inu hoi Iesu ma to'na tino varua i muri a'e i to'na tiaraa mai mai te pohe maira. Luka 24: 43. Ohipa 10: 41. E ua papu roa ia tatou e, ia na reirahia'i tatou atoa e tia'i ia tae te tau i haapaohia e te Atua, no te mea e, "E riro tatou mai ia'na atoa e huru ia fa mai oia ra." Ioane Hoê 3: 2. Ua tia roa te tino i'ô e te ivi e parahi i te basilea o te Atua, no te mea e, ua maue tia'tura Iesu i reira, tia a'era Oia i te rima atoa o te Atua ra, ma to'na tino i'ô e te ivi. E no reira ua papu roa te mana'o e e tino varua atoa to te Atua Metua, no te mea hoê â ia raua i te mau mea atoa nei. E o te hoho'a mau ia Iesu no te Metua. Heb. 1: 3. Teie râ e mea taa ê Oia i te Metua e i te Varua Maitai hoi i te pae tino nei. Ohi. 7: 56. Te Atua Tamaiti; o te hoê ia te Tamaiti i roto i te torutahi o te ra'i. E tino i'ô e te ivi tahuti ore e te hanahana rahi to te Tamaiti. E mea taa ê Oia i te Metua e i te Varua Maitai i te pae o te tino nei. Ioa. 16: 16. Tei ia'na râ te ite te paari e te mana e hope roa'e; tei ia'na atoa te aroha hope ore e te mau maitai rahi atoa i te vairaa. Kol. 2: 9. Ua au to'na ra hanahana i te hanahana o te Metua, e tei ia'na atoa te ora i te vairaa. E Atua ia te Tamaiti. Ioa. 1: 1. Hebera 1: 8. E te faaite papu mai te parau mo'a i papaihia ra e, ua parahi Iesu i te rima atoa o te Atua. Ohi. 8: 56. E rima aha to'na, e rima varua ana'e anei e aore ra e

rima mai to Iesu i te huru i muri a'e i to'na tiaraa mai mai te pohe maira? Eaha'ia te huru o ta Iesu rima a reva'tu ai Oia i te rai ra? E rima varua'ana'e anei to'na? Teie te parau aita roa'tu, no te mea ua haapii mai Iesu e, "A hi'o mai na i ta'u rima e ta'u avae o vau mau â; aita o te varua e i'o e te ivi mai to'u nei." Ua haapii mai te aposetolo ra o Paulo e, "E ore te tino i'o e e toto e parahi i te basileia o te Atua." E parahi râ te tino i'o e te ivi e te varua i reira, no te mea e, o te reira te huru tino mau no Iesu a maue atu Oia i te ra'i ra. E ia faatiahia tatou i nia mai te pohe maira, te reira atoa ia te huru mau o to tatou mau tino nei, ei mau tino varua, no te mea e, ua ore te toto e ua monohia mai ia te reira i te varua, riro'tura ei mau tino varua, mai to Iesu e te Atua Metua ra, na tino varua hanahana rahi ra, e no reira ua tia roa ia parahi tatou i te basileia hanahana o te Atua, no te mea e, ua ore to tatou huru tahuti, e ua riro to tatou mau tino nei e mau tino pohe ore, e a ora'tu â tatou e a muri noa'tu. Ua tupu a'enei te tahi tia-faahou-raa a tia mai ai te Mesia mai te pohe maira. E ua riro Oia ei matamua no te feia i mairi i te taoto ra. E ua riro te mau taeae e rave rahi ei mau ite mau No'na i to'na tia-faahou-raa. Ua haere atu te mau vahine i te menema i te poipoi roa ra e hi'o i te Fatu ra, a roohia'tu ratou, inaha hoi ua faataa-ê-hia te ofai i te menema, e aita râ te tino o Iesu i reira; e te tia noa ra ratou ma te maere, e inaha tia noa maira e toopiti pue melahi i pihaiho ia raton. E ua na ô a'era ia ratou. "Eaha outou e imi ai i te ora i te vairaa o te pohe, aore Oia i ô nei ua tia Oia i nia e ua reva ê na." E i muri a'e i to'na tiaraa mai mai te pohe maira, ua iteahia Oia e te mau taata e rave rahi; a parahi mai i muri a'e i to'na poheraa ma te mau tapao hapa ore e rave rahi, e maha e hururaa i te mahana i te hi'oraahia e ratou, e i te haapii-raa'tu ia ratou i te parau o te basileia o te Atua. Ohi. 1: 3. E i muri atu i te reira ua haapii haere te mau aposetolo i te

evanelia, e aore ratou i faaea i te haapii i taua haapiiraa hanahana rahi ra parau mau, oia hoi te parau no te tia-faahou-raa. E ua haapii ratou o te Mesia iho te oho matamua mai te pohe maira, area i muri iho i to'na tiaraa i nia, ua aueue ihora te fenua, maheu ihora te mau menema e ua tia maira te feia mo'a mai to ratou mau apoo, e ua haere atura ratou i te oire e itea ihora e te taata e rave rahi. Mat. 27: 51-53. E au mau hoa here e o tei taio i teie nei parau i roto i Te Heheuraa Apî a oaoa tatou atoa nei i te Fatu ra ia Iesu, i te mea e, te faaroo, e te tiaturi, e te tia nei hoi tatou i te faraa piti mai o te Mesia ra; e te tia-faahou-raa hoi o to tatou mau tino nei ia pohe tatou. No reira e rohi e a tatarahapa i te mau mea e hapa'i, e e haapao i te evanelia, no te mea e, ei taua mahana ihora i haapaohia e te Atua, e haere mai na te feia i mau na i te parau maitai ra, e tia mai ia e rave i te ora, e te feia i mau na i te parau ino ra, e tia mai ia e rave i te pohe. Ioa. 5: 29. Eiaha râ tatou ei roto i te amuiraa o tei rave i te pohe, area ei roto mau râ i te tiaa ra i parauhia e te Mesia, a na ô ai ra e, "A haere mai outou i te feia i faaorahia e ta'u Metua, e parahi i te basileia i haapaohia no outou." Ei pihai-atoa-iho tatou i te Atua e Na'na e horoi i te roi mata e ua ore roa te pohe, e te oto, e te mihi, e te peapea huru rau. E i reira ua tupu iho nei te maa parau ra e. "E te pohe e, teihea to oe tara?" E au mau hoa e, ia haapao tamau tatou i te evanelia a te Mesia e tae noa'tu i te hopea ra e noaa ia tatou te ora, no reira e faaau i to tatou hororaa ia noaa te rê i muri a'e i te tia-faahou-raa o to tatou mau tino mai te pohe maira.

—VILIAMU SETEMILA.

(E tuatihia mai teie parau.)

“To oe ra mau taata pohe, e ora ia; to ratou mau tino pohe, e tia faahou ia: a ara, a himene, e tei parahi i te repo e! e au hoi to oe ra hau i te hau o te mau raau rii ra; e haapuai mai hoi te fenua i te feia i pohe ra.” Isaia 26: 19.

Te Parau Tuatapapa no  
Iosepha Semita.

(TUATIRAA.)

PENE VII.

MATAHITI 1828-1829.

*E taata faaoromai ore o Maratini Hareti. Ua riro te mau  
api parau i papaihia. Ua taupupu noa te ohipa o tei  
iritiraa parau.*

U A rave noa Iosepha raua o Maratini Hareti i te ohipa  
iritiraa parau êê, tei ootihia i nia i te mau api auro, mai  
te 12 no Eperera e tae noa'tu i te 14 no Tiunu i te matahiti  
1828. E i roto i teie nei na avae ua papai Maratini 116 api  
parau. Ei reira ua haamata Maratini i te titau ia Iosepha ia  
faatia ia afai atu oia i te mau api parau tei oti i te papaihia  
ia faaite atu ia ratou i ta'na ihora utua fare, e ia vetahi ê ra  
mau taata atoa. Ua na ô mai ra oia ia Iosepha, "E ani  
oe i te Atua na roto i te Urima e te Tumima ia faatiahia ia  
na reira." Ua ani atu Iosepha e ua tae mai te pahonora, e  
eiaha. Aita hoi Maratini i mauruuru i te reira, e ua titau  
faahou â ia Iosepha e ani faahou i te Atua peneiae e faatia-  
hia'i to'na ra hinaaro. Ua ani faahou â Iosepha, e hoê â  
pahonora mai, eiaha. Mauruuru ore Maratini i te reira, e  
ua tamau oia i te faahaumani noa'i ia Iosepha i to'na ra  
mau titauroa, ia ani faahou â, aore oia i faaea i te faahau-  
mani noa ia Iosepha e ani faahou ia faatiahia to'na ra  
hinaaro. No to'na titauroa pinepine ua ani faahou Iosepha,  
e ua faatiahia ia afai atu oia te mau api tei oti i te papaihia.  
Mai teie hoi te huru i te faatiaraahia, oia hoi ia faaite atu  
oia i te mau api papairaa i na taata toopae ana'e, tirara'tu  
ai. Oia hoi, te hoê taeae no'na, e i ta'na ihora vahine, e i  
ta'na ihora na metua, e te hoê taeae no to'na ihora vahine.  
E i reira ua ani atu Iosepha ia'na ia fafau oia i te hoê fafau-

raa mo'a no'na, ia ore roa oia e faaite atu i te mau api papairaa i te hoê taata maori râ i na taata ana'e i faaitehia i nia'e. E ua na reira oia. E ia oti a'era i te fafauhia e a'na te tahi fafauraa mo'a ia Iosepha, ua rave maira oia i te mau api papairaa, haere ê atura. Ua parau mai Maratini ia Iosepha e tia maite oia i te mau api papairaa mo'a tei ia'na e e faaho'ihia mai ia te reira e tia'i. Area i muri a'e i to'na revaraa'tu ua faahemahia ia oia e ua moe ia'na te fafauraa i fafauhia'i oia ia Iosepha, e ua faaite'tu oia i te mau api papairaa mo'a ia vetahi mau taata. E muri a'e ua eiâhia'i te mau api papairaa ia'na, e ua riro i te mau enemi e e ore oia e o Iosepha e ite faahou ia ratou. E i muri iti a'e i ta Iosepha ho'iraa'tu i te utua fare, te ori haere ra oia, e inaha hoi ua fâ mai te melahi ra o Moroni e ua horoa faahou ia'na i te mau api auro, te Urima e te Tumima, no te mea ua rave-ê-hia te reira mau mea mo'a ia'na a faahaumani noa'i oia i te Fatu ra a ani ai ia'na ia faatia ia afaihia'tu e Maratini te mau api papairaa o tei moehia ia'na ra. Ei reira ua faaue mai te melahi ia'na a haamata faâhou i te ohipa iritiraa. E ua tae mai te parau ia Iosepha, eiaha e iriti faahou te vaehaa i oti i te iritihia e ua afai-ê-hia e Maratini, e tei moehia ia'na, no te mea e faahuru ê te enemi i te parau o te papairaa mo'a tei ia ratou e riro ratou i te haavare atu i to te ao, i te na ôraa'tu e, ua huru ê ta'na iritiraa hopea i te matamua, no reira te ite papu nei matou e e ore ia te ohipa a te Atua. Ua tuuhia te reira ravea paari e Satani ei faaore i te ohipa a te Atua, area ua morohi-noa-hia ta'na, e ua upootia ta te Atua. Ua papai i hora Nephi te papaa parau i nia iho i na huru api e piti, oia hoi te mau api e huru rahi, e te mau api hoi e huru nainai ra i hamanihia e a'na. I papai na Nephi i te tahi papaa parau i nia iho i te mau api matamua ra, no te hau a te mau arii, e te mau tama'i e te pau rahi o to'na ra mau taata. I papai na hoi oia i te tahi papaa parau no te ohipa

mo'a i ravehia e te feia toroa e te mau tohu papu, e te fau-  
faa rahi i nia i te mau api e huru nainai ra. I faauehia oia  
e te Fatu ia hamani oia i te reira mau api no te hoê opuaraa  
paari Na'na, aita hoi o Nephi i ite i taua opuaraa ra. Te  
Buka a Moromona o te parau ia i papaihia e Moromona i  
nia i te mau api i iritihia no nia mai i te mau api a Nephi.  
E parau haapoto ia i te papaa parau a te ati Nephi, e te ati  
Lamana hoi, e no te ati Iareda atoa, o tei haapurarahia i te  
tau i faahuru ê ai te Atua i te re'o o te mau taata. I itea  
ra Moromona i te papaa parau i ooti i nia i te mau api nai-  
nai a Nephi ra ua māuruuru roa oia i te reira e ua mana'o  
a'era oia e e mea tia roa ia tuati noa te reira mau parau,  
eiaha ia haapotohia, ia vaiiho-noa-hia te reira te huru â ia  
te huru. Te mau parau tei haapotohia e a'na no nia mai  
ia i te mau api matamua i ootihia e Nephi. Te papaa paran  
tei ootihia i nia i na huru api e piti ra no te hoê â tau; area  
tei ootihia i nia iho i te mau api e huru rahi te papaa parau  
ia no te hau o te mau arii, e te mau tama'i, e te mau peapea  
o to'na ra mau taata, area o tei ootihia i nia i te mau api e  
huru nainai ra te mau ohipa ia a te feia toroa, e te mau  
tohu papu e te faufaa rahi i nia iho i te reira mau api. Aore  
o Nephi i ite te tumu i faauehia'i oia e te Atua i hamani ai i  
te mau api nainai ra e e ooti hoi i nia ihora, area râ ua haa-  
pao ihora oia. Ua tuuhia e Satani te tahi ravea paari rahi  
i te enemi ei faaore i te ohipa i faatupuhia'i e te Atua i te  
anotau hopea nei e tia'i; area e paari rahi hau ê ta te Atua,  
e no reira ua morohi noa ta'na opuaraa ino, e ua upootia ta  
te Atua ia'na ra. Te mau api papairaa tei moehia e Mara-  
tini te papairaa haapoto ia na nia i te mau api matamua a  
Nephi. A haamata faahou â Iosepha i te ohipa iritiraa  
parau, ua faaue te Fatu ia'na eiaha e iriti faahou tei oti i te  
iritihia. Area e iriti te parau no nia i te mau api nainai a  
Nephi, ei mono i tei afai-ê-hia e Maratini, haapao ihora oia i  
te reira. No reira ua itea mai ia te paari a te Atua, e te

morohi-noa-raa o te opuaraa haavare a Satani. Maoro iti a'era aore Iosepha i rave faahou i te ohipa iritiraa. A haamata faahou ai oia i taua ohipa ra ua rave maite noa, no te mea, aore a'na ei papai parau maori râ o ta'na ihora vahine o Ema. E maa taime rii ta Ema ua tauturu noa oia ia Iosepha i taua ohipa ra.

I te avae ra o Tiurai i te matahiti 1828, ua fanau o Ema ta raua tamarii tamaroa matahiapo, area i muri iti a'e i to'na fanauraa ua pohe roa te tamaiti ra, no reira ua roohia ihora raua i te ati, e te oto rahi, e e huru maoro i muri a'e i te reira ua vai huru paruparu noa ra Ema. E no reira ua taupupu noa ra te ohipa a Iosepha e tae noa'tu i te avae Eperera i te matahiti 1829.—VILIAMU SETEMILA.

(E tuatihia mai teie parau.)

### Te Maamaitairaa a Iakobo i Tana ra Tamaiti Ia Iosepha.

© TE tuatapaparaa teie nei papairaa no te huaai a Iosepha te tamaiti a Iakobo o tei hoochia'tu i to Aiphiti ra. E ono hanere matahiti hou te fanauraa o Iesu i aratai mai ai te Atua i te tahi pae o te huaai a Iosepha na nia i te moana rahi ra. Mai te fenua maira mai Ierusalema, e e tae roa'tura i te fenua rahi ra i Amerika. No reira ua tupu mau atura te haamaitai ta Iakobo i tuu i nia iho i te upoo o ta'na tamaiti o Iosepha. Genete 49: 22-26.

E huaai ana'e na Iosepha teie nei pūpū taata no roto i te opu o Epheraima raua o Manase. Ua papitihia te haamaitairaa o Iosepha i nia i ta'na tau tamarii, e ua riro raua ei mau nunaa e rave rahi i nia i te fenua ra o Amerika, oia hoi te fenua o Iosepha. Oia ia, e ohi hotu mau o Iosepha i reira, ua horoa hoi te Atua i te mau maitai o te ū e to te opu ra ia ratou. O te hui tupuna ratou no te mau Initia o tei parahi i nia i te taatoaraa o te fenua ra o Amerika i mutaa ihora. E o te hui tupuna atoa hoi ratou no outou, oia hoi te mau taata maohi i te mau fenua moana nei. Tei

reira te tupu-mau-raa te haamaitairaa ta Iakobo i tuu atu i nia iho i te upoo o Epheraima e to Manase. Genete 48: 12-20.

Ua horoa te Atua ra o Iehova i te fenua rahi ra o Amerika ei fenua ai'a no te huaai a Iosepha, e no reira i aratai mai ai oia i te tahi pae o ta Iosepha huaai na nia i te moana rahi ra (oia hoi te aua) e tae roa'tu i te fenua ra i Amerika i te otia o te mau aivi vairaa mure ore ra; ei reira to ratou riroraa ei ahururaa i te mau tautani o Epheraima e te mau tautani hoi o Manase ra. O te fenua ra o Amerika o te fenua ia o Iosepha e o te fenua ia i roaa i te huaai a Iosepha e o te fenua ia tei hau i te maitai i te mau fenua êê atoa ra. Deuteronomi. 33: 13-17.

E mea oaoa mau na tatou ia ite e e Atua mau te Atua. i te mea, ua horoa mai oia i te ravea e ora'i to tatou hui tupuna i to ratou taa-e-raa i te toea o te tamarii a Iseraela. No reira e ere te mea haavare ta Petero i parau mai i te na ôraa e. Ua parau atura te vaha o Petero, ua ite mau atura vau e ore te Atua e haapao i te huru o te taata. O tei mātā'u ra ia'na, e o tei rave i te parau-tia i te mau fenua atoa ra, o te iteahia mai ia e a'na. Ohipa 10: 34, 35.—RUA.



TEIE TE HOHO'A O TE OIRE ROTO MITI, I UTAHA, I AMERIKA.

## Te Mau Parau Api.

I TE 8 no Mati ua tae mai te pahi ra o Manureva, mai Rurutu mai. I to'na tereraa i tua ua roohia ihora oia i te ati mata'i uana, e te miti rahi. E ua pohe roa na puaahorofenua e piti e te tahi mau puaa maohi atoa i nia ia'na.

I te 12 no Febuare ua tae atura te taata faatere ohipa tapuraa e'a pahi i Panama o George Goethals to'na i'oa, i te oire faatere hau no Amerika; ei reira ua faaite atu oia i te peresideni e te apooraa rahi faaau ture e oti ai taua e'a pahi ra i te tapuhia i te hoê no Setepa 1913. E ua parau atoa'tu oia ia ratou, teie hoi te moni e pau i te hamaniraahia, oia hoi 360,000,000 tara.

Ua faatere te hoê taata Farani i to'na pahi reva mai te oire Antibes e tae noa'tu i te hoê motu i tahatai i Italia. Teie te roa no to'na maueraa oia hoi e 200 kilometa. Ei maueraa maere rahi te reira no te mea aita oia i tiaihia e te tahi mau pahi. Ua faatere noa oia i ta'na pahi reva i roto i te reva mai te tia-ore-hia. E ua ite papu oia ahiri ua topa oia i raro aita e ravea e ora'i.

I te 26 no Mati, ua reva'tura to matou na taeae here o Henere raua o Lemuela, i te fenua Amerika. Ua rave itoitō Henere i te ohipa i parauhia'i oia, oia hoi i te neneiraa vea, e te haapiiraa evanelia, e toru matahitie tiahapa, a parahi ai oia i ô nei. O Lemuela e taeae apî mai; area e taata mai iho â oia, e aore teie nei fenua mahanahana e au ia'na, no reira ua ho'i atu oia i te fenua Tarafonia. Ua tupu ihora to matou aroha rahi i te revaraa'tu o to matou na taeae here i te evanelia nei.

Ua roohia te oire o Pekin i te fenua ra o Taina i te'o'e e te tahi mai ino roa i parauhia plague. Teie te rahi o te taata o tei pohe roa i teie nei 30,000. Aita te mau taata toroa i ite maitai te huru no taua ma'i ra, no te mea aita e ravea e tae atu ai ratou i te mau vahi, tei tupu noa ra taua ma'i ra. Area te mana'o nei te hoê taote Amerika e, eita e hope i te taio te feia pohe no te rahi. Te rave nei taua taote ra i te ohipa tauturu i te mau taata i maihia. E te mana'o nei oia e, e pohe paha hoê milioni taata.

I te 8 no Febuare ua parau te hoê taata parau reva mai te oire San Francisco e tae noa'tu ia Iapone. E 5,700 maile te atea. Ua tae na pahi auahi e piti, te Manchuria raua o Korea e 3,295 maile i tua. Ua parau taua taata ra i San Francisco i tera na pahi e ua ui atura oia ia raua i te huru no te rai i reira. E na taua na pahi ra i parau faahou atu ia Iapone e ua ui atura. E ia tae mai te pahonora no reira mai ia raua. Ei reira ua faaite atu raua i te parau i taua taata ra i San Francisco. E hoê hora te maoro no to ratou paraparauraa, e e mea papu hoi.

Te ati nei e piti milioni taata i te fenua Tinito i te poia, e mai te mea e, aore ratou i tauturu-oioi-noa-hia e pau ratou i te pohe. Te vai noa ra te mau tino pohe e rave rahi i nia i te mau purumu i teie nei. E teie nei ua apitihia to ratou ati poia, i te ati toetoe, e te hiona. E tupu nei te aroha ia haamana'o noa'tu tatou i to ratou mau ati riaria ra.

Te hamani nei te tahi sotaiete i te oire Lonedona i Beritani, te ahu tane no roto mai i te tahi raau i parauhia spruce. E ravea itea-api-hia te reira, e te parau nei te taata i itea te reira e hau a'e te ahu i te maitai, e te hoo mama hoi, i to te ahu i hamanihia no roto mai i te vavai. E te parau atoa nei oia e, ua faatorehia te reira ahu raau, e ore e maheahea e aore e hirohirouriraa. No reira te oaoa nei â ratou i teie nei ravea apî i imihia e ratou.

I te 23 no Febuare i te fenua ra o Finland te parahi ra na taata ravaai 500, i nia i te miti paari, ua haapaarihia te reira e te toetoe. E inaha ua mahiti i te vahi i haamauhia i te pae tai, e ua panu noa i tua. E muri a'era ua amahamaha i na tufaa e rave rahi. E i reira e rave rahi te mau taata ua topa i roto i te miti, pohe roa i hora. E muri a'e ua panu na tufaa rarahi e piti i te pae tai e ua mau; ei reira ua ora'tura 120 taata. Area te rahiraa o te mau taata ua pohe roa paha i tua.

I te 28 no Febuare ua tae te tahi pahi auahi Niu Zilani faauta arahu i Vairao. Teie te tumu i tae mai ai, maori râ ia farerei oia i te tahi pahi manuâ Beritani o Challenger te i'oa. E i te hora 4 i te ahiahi ua tae atoa mai taua pahi ta'na e tia i ra, mai te fenua ra o Ausaralia mai. E ua rave oia i te arahu 1,400 tani no nia mai ia i te pahi Niu Zilani. E pahi huru rahi hoi taua pahi manuâ ra, oia hoi, 5,900 tani. E 450 taata tei nia iho ia'na. Ua rau te mau huru maa ta te mau mataro i hoo i reira. E tere hiopoa haere to'na, no reira aita oia e mau maoro i te vahi hoê. E 4 noa iho mahana oia i ô na. Ei reira to'na revaraa'tu i te fenua ra o Amerika.

I te oire Huntington ua iteahia te hoê taata apî i te vai noaraa i nia i te purumu e ua pohe roa oia. O Tehare Majors to'na i'oa. Te inu ra oia i te ava i roto i te fare hooraa ava e tae noa'tu i te hora ahuru e ma hoê i te po; ei reira ua faarue oia i te fare ava, e ua haamata oia i te haere atu i to'na i hora fare. Aita râ oia i tae. Ua afai atu oia i te hoê mohina ava i to'na haereraa'tu area râ ua parauhia e ua iti tei pau ia'na i te inuhia. E piti maile te atea o to'na fare, e ua haere oia hoê afa maile, ei reira ua mairi oia i raro e ua pohe roa. Ua hiopaohia oia e te hoê taote paari roa e ua faaite mai taua taote ra i te tumu no to'na poheraa. Teie ia, na roto i to'na peu inuraa ava ua haaparuparuhia to'na mafatu e ua ma'ihia. No reira ia inu faahou oia i te ava ua faaea to'na mafatu i te hutiraa i te toto i roto ia'na. Te reira te tumu no to'na poheraa, oia hoi te inuraa ava.

Ua ani mai te peresideni no te hau Amerika i te hui raatira ia horoatu i te tahi moni e te maa hoi ei tauturu i te oire i roohia e te ati i te fenua Tinito. E ia haaputuputu i te mau mea tei horoahia mai i te hoê oire i te hitia o te râ i Amerika, e ia rahi te taihaa ei reira e faatomo ratou i te hoê pahî rahi no te hau e afaihia'tu te reira mau mea i te oire Pekin ei maa e ei ahu no te mau taata ua ere i reira.

I te mahana 18 no Febuare, ua tapae mai i Papeete nei, to matou na taeae orometua tooiva no Niu Zilani. E ao a'era reva'tura ratou i te fenua Amerika. Te hoê o ratou o Rulon C. Haacke to'na i'oa ua ma'ihia, te tumu a ho'i atu ai oia. E i muri a'e i to ratou revaraa'tu ua tupu to'na ma'i i te rahiraa, e ua pohe roa. E i te mahana 25 no Febuare ua tanuhia oia i roto i te moana. Ua tae mai to'na metua tane i te oire San Francisco, a farerei ai i ta'na tamaiti. E inaha i te tapaeraa mai o te pahî, aita ta'na tamaiti i nia ihora, ua pohe ê na, e ua hunahia i tua. E i reira ua tupu to'na aroha i te rahiraa, e ua oto ihora. E poheraa, e e tanuraa aroha rahi hoi te reira.

Ua tae mai te hoê taata moto mai te fenua Amerika mai na nia mai Mariposa, o Jack Lester to'na i'oa, i te mahana 22 no Mati i mairi a'enei, e te haere nei oia i Ausaralia e moto i te taata tuiroo ra, ia Bill Lang to'na i'oa. E i to'na tapaeraa mai i te Tahiti nei, ua anihia'tu oia e haere i roto i te fare teata ra i Papeete nei e faaite i to'na puai i mua i te aro o te mau taata'toa, e ua faatia mai oia. I te po ua haere oia i roto i te fare teataraa, e ua rave oia i to'na ahu motoraa, e ua moto oia i te hoê popo o tei faatautauhia i nia a'e i to'na upoo, i raro a'e i te hoê tahua o tei faatiahia i nia mai na pou e maha, i mua ia'na, e mea faahiahia te hi'oraa i i to'na motoraa, e ia oti te reira. Ua rave oia i te hoê taura e ua ou'a pohue oia, e ia oti ia, ua faafefe oia i te naero Farani e ono iti i roto i to'na rima, e ia oti ia, ua taorahia to'na mata i te hoê popo rahi e ua û i nia ia'na, aore roa e peapea, e teie te hopea o ta'na ohipa i rave, ua ani oia i te hoê taata Tahiti haere mai e moto hauti noa, e ua haere atura te hoê taata o Faatiarau to'na i'oa, ua moto raua e inaha e taata moto iho â, aore ra oia i moto noa'tu ia Faatiarau ua tatara noa ra oia i te moto a te taata Tahiti, e taata ite hoi ia hiohia'tu, e to'na matahiti 19 noa iho to'na paari, e taata apî roa.

---

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.